

**Editorial****“Adyuhna cha Khazohpa eih a châ” (2 Tr. 20:17)**

Atahma hlata Myanmar râh liata eima tyh ngapa rairuna he a chyh chaipa ta mia thôh a y tahpa ta athaipazy ta ama reih. Chazy cha ryureina liata rairuna (political crisis), Covid-19 hriiah vâta rairuna (pandemic crisis) nata atiavyna liata rairuna (economic crisis) zy he a châ. Ryureina duahmo cha sawhkhâ mianopa likawh liata bierei hlasapa a châpa vâta thi nata hro ahhupa duahmo liata eima y. Abohna su tluapa ta noh chareih nôpopa ta eima y. Covid-19 hriiah vâta eima chhyna ryhpazy rao khai ta, hawtizy siku kia thaikhao leipa ta kôno tlai ta ama y haw. Eima kyhpachâ ngâsâpa eima pastor zy, eima nôpawpa zy, eima unawhpa zy hrona hluhpi eima pahlei haw. He potlana tawhta avaina phapa hnei thei khao leipa pita noh chareih chihuhpa ta eima y. Sawhkhâ riarina nata khizaw Covid-19 potlana vâta eima khihsa rairu viana lâta eima sie laih lymâ. Marasawzy cha eima awnanopa sôh he sawhkhâ raihriapazy tawhta BTS nata tilaipi khô lâta eima awnanopazy tawhta deichhupa châ via pita, atahma cha CDM taopa hluhpi vâta nata foreign tawhta sôh paphaona zy rairuna vâta awnanopa sôh he tha ta tlapahnai ta awnanopa chhao tha ta rie a thei pathao haw. Sievawna pha khao leipa ta noh chareih ta eima peimawhpa niedo nata chhaichhi zy phaoh thei khao leipa pita tha ta a mâzy a sâh ta sapha bag chalei awpa hnei khao leipa pita, petrol mâ zy tha ta a sâh ta Bike chhao hmâ thei awpa duahmo liata y khao mapi. Niedo a hnei khao leipa hluhpi y haw pita, eima râh liata khih eima sa pazao thei awpa chhao hnabei a seih thei khao mapi.

Cha hawhpa duahmo liata y haw pita chazy tlai cha zawpi chariah laichaipa a vaw châ haw. He chariahzy tawhta eimâ boh thei nawpa ta Khazohpa ta “Adyuhna cha keima eih a châ” a

tah. Israel sahlaozy Kana râh ama ngia thei nawpa ta Kheipangiah hmâpa ta Amawrimo chariah â dyuh kheituhpa kha Khazohpa a châ (Zs. 24:12). Izarel mo a dyuh awpa ta a vaw siehnaopa Môaba chariah nata Amawna mo chariah zy âmo sasyh ta a padyuhsa ta a pahniekheituhpa kha Khazohpa a châ (2 Tr. 20:22-23). Suria chariah ta Samari khihpi dôhpa ta nie awpa hnie khao leipa ei ta, ama sawzy taih thiepa ta ama niena taihta rairu amâ tyh nota, aphawhpa papalih hmâpa ta Suria chariah pahniekhei ta nie a pietuhpa kha Khazohpa a châ (2 Ab. 7:3-12). Sadraka, Meshaka nata Abenekô zy mei chichhihna tawhta pabohsa ta a pachhatuhpa chhao kha Khazohpa pyly a châ (Dan. 3:19-23).

Chavâta Awnanopazy cha Khazohpa sawzy châ pita, Khazohpa ta bie maniah â taihpa cha “Adyuhna cha keima eih a châ” a tah. Khizaw rairuna nata rietheina eima siepahlie thei nawpa ta Khazohpa ta eima chariahpa rairunazy cha maniah a dyuh khei aw ta, maniah a pachha tlai hra aw. Chi tu leipa sila, riachhiepa ta y hra kha ei su. Khazohpa ta eima rairuna duahmo tawhta maniah pachha aw ta, maniah a puakhei hra aw tahpa a ngiapâ ei suh u!

CCMB ta Coid-19 Testing Training a hnei

Eima râh chheipâh liata Covid-19 hriiah he a poh via nga. Eima râh chhôn liata chhao â vaw ngiah daimâ haw. Avaina tlâtlohpa deikua hnei thei mah mapi. Chavâta eima râh chhôn hriiah tawhta eima vai thei via nawpa ta Calvary Clinic Managing Board (CCMB) ta Lialaipi liata deita Covid-19 testing tao awpa â daih a tah khao leipa vâta Covid-19 Emergency Response Centre liata Covid-19 Testing Training cha October 1, 2021 noh piepa a châ. Eima râh liata peimawh viapa nata khih lai viapa zy khi 5 atlypa châ ta, chazy cha: Patheitla, Para, Sabyh, Ngephepi nata Lelai zy a châ. Ngephepi tawhta vaw tlô thei leipa ei ta, khi 4 tawhta mo 8 ama vaw tlô thei.

No	Khith	Moh
1	Patheitlâh	Puhpa Pa Maung & Puhpa Chitha
2	Parâ	Puhpa Silei & Puhpa Chhuasa
3	Sabyh	Puhpa Bielai & Puhpa Lailei
4	Lelai	Puhpa Liachô & Puhpa Daichhua

He mo 8 zy he Saya Khaitha (Health Assistant, Lialaipi) chhithana ta Covid-19 test taona dâh pachupa châ ta, khikha ta Covid-19 avaina chhaichhi (PPE 3, Surgical Gown mia 3, Testing kit mia 25, E Glove bao 19, Facia shield 2, Handgel byh 1, Mask mia 100, Para hmô 50 nata Sodium Hypochlorite liter mia kha chyu) piepa a châ. Eikha testing taona mâ he Ks. 10000/- a châ.

Kafi daw baona

Japan INGO sâkha a châpa Terra People Association (TPA) nata MEC raihria khona tawhta Kafi daw baona piepa a châ. He hawhta TPA tawhta tha patlôna ama taona chhâpa he Mara râh he Kafi puana râh pachâsa ta chhônkhâ ativyina pha viapa hnei theinaw awpa vâta a châ. Kafi daw baona piepa khizy:

1. Sabyh – 4,900,000 /
2. Chakhai / Taubu – 680,000 /
3. Pintial (Komai) – 2,000,000 /
4. Lailenpi – 2,800,000 /

Mch. Zaphetha (TPA Director)

Lelaipi bia nata râh châta thlahchhana

Eima râh sawhkhâ riarina vâta buana adyuna pyu pathâhpazy vâta china thlahzonazy sai ta eima thei, miah a vaw hnia via lymâpa hawhta eima duahmo a châna daihti liata thlahchhana program hnei awpa ta bia OB ta September 20/ 2021 (Mon) noh a vaw raopa a châ. Lelaipi chhôn liata vaih (11) lâta pachhahpa ta râh châta thlachhana hneipa a châ. Pastor zy ta ta thlahchhana chhithana ama hnei. “Chi kha ula, adyuhna cha Khazohpa eih a châ’(2 Tr. 20: 15b)” tahpa biepipa hmâpa ta nohkha chhôn ahmâna hneipa a châ. Tahma hla eima râh adyuna vâta rairuna eima tyh haipa nata azaopa thlahchhana tlâhpipa sâsari taopa ta zawpi thlahchhana hneipa a châ. Eima thlahzo chaina daihti liata thlahchhana program eima hneipa cha tha ta eima thlalôhna miah a pahneisa hmeiseih. Awnanopa zydua chhao he hawhta he hawhpa daihti liata thlahchhana program eima hneipa vâta eima ly kaw sai.

Zehosapha nata a sahlao zydua chhao Amawna nata Moaba chariah china vâta thlahchhana ama hneina daihti liata Khazohpa ta ama thlahchhana zy thei ta amo chhâh a châpa hawhta atanoh eima thlahchhana zy Khazohpa ta byhnâ a pie cheingei aw tahpa hnabeiseihna miah apahneisapa vâta eima ly ngâsâ.

Pro. Serô, Associate Bietuhpa

General Department

Târi 22-24 September 2021 chhôn MEC Office, Sabawngpi liata hriatuhpazy Computer achuna nothô chhôn hneipa châ ta, thata eimâ thôkhei. Pachutuhpa Rev. Pahmô (Lecturer, LTC) chô lâ liata alyna bie eima hlâ. Hmialâ chhao achu pazao thei aw ta, khona eima hnei. Atahmâ lâ eima chu theipazy cha 1) Computer hmiapahnosana 2) Microsoft Word 3) Booklet taona dâh 4) Châbu Section pachhahna 5) Excel hmâna dâh 6) Format & Design taona dâh 7) Photoshop 8) Microsoft liata Excel hmâna dâh 9) Certificate taona dâh 10) Office raihria liata peimawh viapazy achuna-zy a châ. Pachutuhpa, Rev. Pahmô, ta khokheina bie he hawhta a reih. *"Awnanopa liata chakaotuhpazy deichhyna tovyuh ei topa he kei châta ronâh ngâsâ ta, alychhih kawpa a châ. Keimo Office liata hriatuhpazy zôphana he Awnanopa moh phana châ ta, keimo tiamana he Awnanopa byhnâ tona a châ."*

Lutheran Churches of Australia tawhta MEC hriatuhpazy châta rairuna pathlâkheina châta baona raipa a châ. He baona raina Program he Rev. Teitu Hall, MEC Office, Lialaipi liata September 15, 2021 noh ta hneipa a châ. He baona he Mission lâta hriatuhpazy nata Foreign liata pastorzy pahlaio leipa châ ta, MEC liata hriatuhpa pastor zy, Office nanopazy liata hriatuhpazy mo 81 hnohta raipa a châ. Hriatuhpa mo pakha ta Ks. 100000 (One lakh) chyu piepa a châ.

Atakô 2021 Theological Seminar he chalihsa chaneipa a châ. 2020 kô liata MEC Theological Seminar cha Heimata khith liata hnei awpa ta pachhuapanohpa châ taraw ta, Covid-19 vâta chalihsapa a vaw châ haw. Atakô 2021 liata chhao Covid-19 nata râh riarina vâta Heimata khith liata thao awpa ta program eima tao haipa Theological Seminar cha chalihsa chaneipa a châ.

Pastoral Department

1. Kihpi Pastor Bia Awnanopazy Duahmô:

Pheisai ta râh bie hneina a vaw lana February 2021 tawhta kihpi MEC pastor bia liata local Church zy cha riarina lâta ama pangai. Matupi pastor bia liata Mindat MEC local Church cha adyuna vâta July 2021 chhâna liata a riari ta, Hakha pastor bia liata Thatla MEC local Church chhao adyuhna vâta September 2021 chhoh liata a riari haw. Kihpi MEC Church mia 2 liata eima memberzy cha adyuhna tawhta abona tluapa ta ama pai khai hawpa vâta Rev. Zahne, MEC Mindat pastor cha Lelai kaw pangai ta, Rev. Biehlô, MEC Thatla pastor cha Thatla pai IDP camp liata a y. Mindat nata Thatla tawhta riapaipa eima awnanozy, ama viasazy nata eima pastor zy he thlachhâna chô ta theina hawhta deichhpa tao vuyh eima hnei.

Kihpi liata MEC member hluhpi cha ama raihriana nata yna su ama puasai lymâpa vâta kihpi liata MEC local Churchzy cha maluh chy viana lâ ama pangai. Kihpi liata eima awnanozy cha ama rie thei kaw. Myanmar râh liata kihpi hluhpi duahmô cha riarina lâta a pangai lymâ chy vâta kihpi pastor bia liata local Church nata memberzy, eima pastorzy châta thlachhâ via lymâ su vy. Yangon pastor bia liata Rev. Thaulei, Hakha pastor bia liata Rev. Khaibie nata Kalay Myo pastor Rev. Bietlei nata Matupi pastor bia liata Rev. Beilawkhai nata ama chakao haipa awnano zydua thlachhâ bao ama ngiah kaw.

Paletwa pastor bia; Paletwa MEC nata Sahmi MEC liata memberzy nata pastorzy: Rev. Se U, Rev. Kesaoma zy cha âbohpa ta ama y chy vâta eima ly kaw. Mara râh pastor bia liata local Church zydua deikua lâ riarina tawhta amâ boh chy. Raona tawhta eima boh thei nawpa ta pari hawhta sona hneipa ta Khazohpa lâ thlachhâ lymâ su vy tahpa Zisu Krista moh ta ei cha naoh ei.

2. November 7, 2021 HNA SUNDAY Hmâna

MEC râh chhoh liata moh roh theipa HNA maluh he 214 a châ. 2020 liata HNAsy he thlachhâna, mo pakha deichhyna Kyats 17000/- chyua piena ta chakao theipa ama châ. Tahmâhlâ daihti, eima hry liata deichhy a ngiah chaipazy cha HNAsy châ ei ta, deichhy pha via su vy. HNAsy he a hmô thei leipa, theina nakhao a

pha leipa, ku thatlô leipa, pheh thatlô leipa, thari thatlô leipa, palôh chie leipa, hnatla khao leipa tahpa ta ama pachhaih. Palôh thapatlôna, Khazohpa bie ta thlapalôhna, pathlua leina, hmopiena hpz ta HNA viasazy chakao pha awpa Zisu Krista moh ta eima hrua. Na tlahna, thatlôna, hria theina byhna na topaz y reipati lâ HNA châbyh liata piena ta Khazohpa lâ alyna bie rei chy su vy.

Mission Department

1. MEC 2021 September thla a pahrana ziza

Awnanopa ta eima paso kawpa September thla apahrana cha zawpi ta ahmâ thaipa châ vei hra sala, Local Mission Board zy hmah la phana vâta Local thokhazy liata Long-Speaker ta tlâ-aw eita, thokha liata Awnano Machâ Bia ta ahmâ eita, thata amâ thokheipa ta pahnopa a châ. Atakô Thâthipha Tlôna Noh (26 September) chhao aly kawpa ta ahmâ theipa châ ta, thyuna sôh chhao kô hro hlâta eima hmô hluh via tahpa thâthipha eima daoh. Covid-19 nata râh buana hry ta nama hneina sôh ta Krista nama chakao pazao thei lymâpa vâta alyna bie eima cha hlâ ei. Namâ pie pasaina chô liata ABeipa ta byhnâ pie mawh sy!

2. Lelaipi Bia nata 2021 Apahrana

2021 kô apahrana cha sawhkha riarina nata Covid-19 potlana hry ta zâ chareih ta apahrana ahmâna he daihti chhâna taihta hlaotloh kawpa ta eima hmâ hnei theipa vâta ABeipa moh cha reithaipa ta y mawh sy. Potlana hriiah vâta zawpi ta achhynazy hnei thei mah leipa châ hrasala awnano machâ bia ta September apahrana daihti eima hmâ lymâ. Lialaipi bia chhoh liata L. station bia (8), Lialaipi vaihpi bia (14) nata Lelaipi A (18) pachhaihpa ta su raopa liata zâ chareih nata Sunday my apakhynazy ta ahmâna hnei theipa a châ. Su raopa liata zâ chareih ta achhyna liata hawti machâ tiama kawpa ta achuna hnei lymâpa a châ. He hawhta apahrana châbu zâ chareih eima chuna vâta missiona eima chakaona kyh liata thyuna kyh peimawhna eima hneina tha ta eima pahnopasia hmeiseih. Lialaipi bia liata a ypa pastor zydua chhaota machâ bia ta ahruana su maihta pachuna ama hnei lymâ hra.

September 26 thâthipha tlônoh liata thyuna cha he hawhta hmôpa a châ. Eima rairu chaina daihti châhrasala eima thyunazy â sâh via lymâ

hra. L. Station (850,000), Lelaipi vaihipi (1,600,000) nata Lelaipi A (1,700,000) hlei saita thyuna sôh hmô theipa a châ. September 26 thâtihipha tlônôh liata bia chyua ta niedo pakhyazy chhao hnei chyupa a châ hra. Thokha vao zy thiépa ta niedo achhuahdypazy chhao eima bia chhôn liata ama ypa vâta thâtihipha hmo taotheina eima bia chhôn liata phualua lymâpa vâta eima ly kaw sai.

KTP Department

1. Covid-19 vâta râh chhôn KTP chakaona zydua cha suduthliepa hawhta sie pha mâh vei. November nata December thla-zy he KTP CC "Reithaina & Achhyna Py" Local chahlôna châta raopa châ ta, sienawpa chhao asia mâh leipa ta, thlahchhâna ta eimâ patôpatiah ngâ.
2. Ei (7) MECA Pakhyipi cha 4 September 2021, Iowa liata hlaotlo kawpa ta taopa châ ta, MECA KTP Nôpawpazy (USA Local KTP zy sypahmaopa) atlyna hneipa a châ. 2020-2022 MECA KTP Office Bearers Nôpawpazy cha arylâ hawhta ama châ. MECA KTP nata Hqrs. KTP azaona a pha via lymâ bâ aw tahpa miah chho eita, eimâ ly ngaita kaw!

Chakaona	Moh	Atahmâ yna	Khih
Chairperson	St. Tun Tun Oo	N. Carolina	Aru
Vice Chairperson	St. Biepwaw	Indiana	Taubu
Secretary	Rev. Aukô	Georgia	Leika
Assistant Secretary	St. Phei Tha	Maryland	Ngephepi
Finance Secretary	St. Rôna	Tennessee	Taubu
Treasurer	St. Tla-u (Tla Tla)	Kentucky	Sabyh

Department

1. KNP Leadership Training cha Covid- 19 hri iah nata eima ra riarina vâta chalihsa chyua a châ aw.
2. KNP CC liata KNP Hlapy nata Hla Solo ataopasuana châta atlypa Hlazy Hlapy - **“Nathlie Beipa chakao tuhpazy”** (ECM Hla bu laipa 443)
Solo - **“Zisu ta a cha aw hai”** (ECM Hla bu laipa 256)
He hlapy nata Solo he nama Synod ryureihna chyua liata ataopasuana hneipa châ awta, cha liata miakhana (First) ahmôpazy ta Synod vyupa ta CC liata ataopasuana hneipa a

châ aw. Chavata Hla achunazy liata vaw tiama chyua u la, 2022 KNP CC Leika liata a rônah kawpa ta hmâh theina awpa ta KNP thlahchhâna maih liata Khazohpa lâta pavaosa lymâ suh vy.

KHP Department

1. KHP Sunday December 5/2021 cha eima tlô daima haw heih. He daihti liata KHP sahlaozy aly kawpa ta eima hmâ thei nawpa ta program pha kawpazy vaw hnei chyua muh vy. Local nôpaw nata a chhohiana phapa hnei lymâpa a châ aw.
2. He daihti liata Singsong service zy hnei khei thei chyua awpa ta khohkheipa a châ.
3. Ei (14) na KHP Central Conference agenda pha kawpazy December thla chhâ hlâ ta KHP Secretary Hqrs, Lailenpi lâta vaw paphao khai thei bei muh vy.

SD Department

Sadô phapa ta râh pabohsa suh vy. ABeipa ta eima râh he asaipa ta hmâ thei awpa ta maniah a pasai chyupa vâta alyna bie hla chyua su vy.

1. MEC – SDD ta Marapa he odyhto ta sadô/leipalie achychaita Acre sa (2) sai (VAC khokheina chahna chhaopa) hnei khai thei awpa ta a râpasua hai pa hawhta Atahma October thlasy eima vaw tlô bapa vâta sadôzy nama vaw patopatiah khai beipa ta eima cha haw. Eima râh pabohsa nawpa ta October, November he sadô lyuvâna daihti pha chaipa châ ta lyurâhpazy mei ta a kê thai hlata sadô raona hnei khaipa ta eima pachhuapanoh awpa a châ. Eima râh â boh thei nawpa nata khizawzy sadô ama hnei thei nawpa ta VAC, khih nôpaw LFA board zy ta khihsaw nopavâhsana vaw tao chyua teh u.
2. Sadô su liata thokô laipa nama thie khopazy a y khia October, November, December he thokôpa â môna daihti a châpa vâta athie nao chaina daihti a châ. Nama thiekhohpa kê a thaby tawhta feel 2’ chô lâta a kua kha a sasapa aphapa ta âlâna taih achy chai ta lema 6” pathai awpa châ awta na pathaina tawh arylâ a chhyhzy a vaw pua khiah chhaw tyh awpa a châ aw; na chhawh vei khiah a thi a ru kaw aw.
Marapa eima zydua ta sado / leipalie phapa hneina ta eima râh he pabohsa su vy!